


Lanem Pikinini Bilong Iu



Lanem Pikinini Bilong Iu

“Iufala mas lovem God bilong iufala Jehovah long full heart bilong iufala, long full soul bilong iufala, and long full strong bilong iufala. Olketa toktok wea mi talem iufala tудay mas stap long heart bilong iufala. Iufala mas evritaem teachim and storyim olketa samting hia long olketa son bilong iufala taem iufala sidaon long haos, taem iufala wakabaot long road, taem iufala redi for sleep, and taem iufala wekap.”

—DEUTERONOMY 6:5-7.



Insaed

LESON		PAGE
1	Wanfala Secret wea Bae Mekem Lumi Hapi.....	4
2	Rebekah Laek Mekem Jehovah Hapi.....	6
3	Rahab Trustim Jehovah	8
4	Hem Mekem Dadi Bilong Hem and Jehovah God Hapi.....	10
5	Samuel Evritaem Duim Stret Samting	12
6	David Hem No Fraet.....	14
7	Waswe, lu Savve Feel Sorre and Fraet?	16
8	Josiah Fren Witim Pipol wea Duim Stret Samting	18
9	No Eni Samting Stopem Jeremiah for Story Abaotem Jehovah..	20
10	Jesus Hem Evritaem Obey.....	22
11	Olketa Raet Abaotem Jesus Long Bible	24
12	Wanfala Young Man wea No Fraet	26
13	Timothy Laek Helpem Pipol	28
14	Wanfala Kingdom wea Bae Rulim Full Earth.....	30

Wanfala Secret wea Bae Mekem Iumi Hapi

Waswe, enitaem eniwan talem iu samting wea hem no talem long olketa naran?—* Datwan hem wanfala secret. Bible hem storyim wanfala spesol secret wea olketa kolek **“datfala holy secret.”** Hem holy bikos hem kam from God. And hem wanfala secret bikos no eniwan savve abaotem datwan. Nomata olketa angel tu olketa laek for savve long datfala secret. **Waswe, iu laek for savve long datfala secret?**—

Long bifor kam, God wakem firstfala man and woman. Nem bilong tufala Adam and Eve. Tufala stap long garden

* Long evri story insaed disfala brochure bae iu lukim disfala mark (—) bihaen long samfala kwestin. Taem iu kasem diswan, hem gud for iu stop lelebet and letem pikinini bilong iu for ansa.

READIM OLKETA SCRIPTURE HIA:

Mark 4:11

1 Peter 1:12

Genesis 1:26-28; 2:8, 9; 3:6, 23

Matthew 6:9, 10

Psalm 37:11, 29

bilong Eden, wea hem nao wanfala naes ples God givim long tufala. Sapos Adam and Eve obeyim God, tufala and olketa pikinini bilong tufala savve mekem full earth wanfala paradaes, olsem datfala garden. And olketa savve stap olowe long Paradaes tu. **Bat iu savve wanem nao Adam and Eve duim?**—

Adam and Eve no obeyim God. Dastawe iumi no stap long paradaes distaem. Bat God talem finis hem bae mekem full earth wanfala paradaes, wea pipol bae laef olowe and olketa bae hapi. Hao nao bae hem duim diswan? From hem wanfala secret, staka pipol no savve long diswan.

Taem Jesus kam long earth, hem talem pipol samting abaotem datfala secret. Hem sei secret hia hem abaotem Kingdom bilong God. Jesus talem pipol for prea for datfala Kingdom for kam. Datfala kingdom bae mekem earth kamap paradaes.

Waswe, iu laek for savve olketa nara samting abaotem datfala secret?— Tingim, pipol wea obeyim Jehovah nomoa bae stap long Paradaes. Bible garem staka story abaotem olketa man and woman wea obeyim Jehovah. **Waswe, iu laek for lane abaotem olketa?**— Bae iumi storyim samfala long olketa and hao nao iumi savve followim example bilong olketa.

Iu tingse olketa angel laek for savve long wanem?



OLKETA KWESTIN:

- Wanem spesol secret nao Bible story abaotem?
- Why nao earth hem no paradaes distaem?
- Wanem nao Jesus talem long pipol abaotem datfala secret?
- Wanem nao iu mas duim mekem iu savve stap long Paradaes?

2

Rebekah Laek Mekem Jehovah Hapi

Rebekah hem wanfala woman wea lovem Jehovah. Hasband bilong hem Isaac and hem tu lovem Jehovah. Hao nao gogo Rebekah maritim Isaac? Wanem nao Rebekah duim wea showimaot hem laek mekem Jehovah hapi? Firstaem, iumi bae story abaotem Isaac.

Dadi and mami bilong Isaac hem Abraham and Sarah. Olketa stap long Canaan and pipol long there no worshipim Jehovah. Bat Abraham laekem son bilong hem for maritim gele wea worshipim Jehovah. So hem sendem wanfala wakaman bilong hem, wea maet hem Eliezer, for go long Haran for faendem waef for Isaac. Samfala relative bilong Abraham stap long there.

Haran hem farawe from Canaan. So olketa nara wakaman bilong Abraham tu go witim Eliezer. Olketa tekem tenfala camel wea karem olketa kaikai and present. Wanem nao bae mekem Eliezer luk-savve long gele wea bae fitim Isaac? Taem Eliezer and olketa nara wakaman kasem Haran, olketa rest klosap long wanfala well. Eliezer savve olketa gele bae kam for tekem wata long there. Hem prea osem long Jehovah: 'Sapos mi askem wanfala young gele for wata and hem givim wata for mi and hem givim tu wata long olketa camel bilong mi,



Rebekah willing for waka hard for tekem wata for olketa camel

bae mi savve hem nao gele wea iu chusim.'

Gogo Rebekah kam long well. Bible sei hem wanfala naesbola gele. Eliezer askem wata long Rebekah and hem sei: 'Mi bae givim iu wata and bae mi tekem wata for olketa camel bilong iu tu.' Tingim, olketa camel kam farawe and olketa laek drink tumas, so Rebekah mas go staka taem long well for tekem wata for olketa. **Olsem iu lukim long piksa, Rebekah waka hard for duim wanem?**— Eliezer barava tinghae long hao Jehovah ansarem prea bilong hem.

Eliezer givim Rebekah staka naes present. Rebekah talem Eliezer and olketa nara wakaman for kam long haos bilong olketa. Eliezer talem famili bilong Rebekah why Abraham sendem hem kam and wei wea Jehovah ansarem prea bilong hem. Famili bilong Rebekah agree for letem hem maritim Isaac.

Bat waswe, iu tingse Rebekah laek for maritim Isaac?— Rebekah savve Jehovah sendem Eliezer for kam. So taem



famili bilong Rebekah askem sapos hem laek for go long Canaan and maritim Isaac, hem sei: 'Ia, mi laek for go.' Then hem go witim Eliezer nao. Taem olketa kasem Canaan, hem maritim Isaac.

Rebekah duim wanem Jehovah laekem, so Jehovah lukaftarem hem. Bihaen staka year, Jesus born long laen bilong Rebekah! Sapos iu mekem Jehovah hapi olsem Rebekah, Jehovah bae lukaftarem iu tu.

OLKETA KWESTIN:

- Wanem nao iu lanem abaotem Rebekah?
- Why nao Abraham no laekem Isaac for maritim gele long Canaan?
- Wanem nao mekem Eliezer luksavve Rebekah nao hem gele wea Isaac shud maritim?
- Wanem nao iumi savve duim for followim example bilong Rebekah?

Rebekah go witim Eliezer long Canaan and hem maritim Isaac



Rahab Trustim Jehovah

Wanfala woman wea nem bilong hem Rahab hem stap long Jericho. Disfala taon hem stap long Canaan and pipol long there no biliv long Jehovah.

Taem Rahab hem smol gele, hem herem olketa story abaotem hao Moses hem leadim olketa Israelite go aot long Egypt and hem divaedem Red Sea. Hem herem tu Jehovah helpem olketa Israelite for winim olketa enemy. Bat distaem hem herem olketa Israelite camp klosap long Jericho nao!

Wanfala evening, tufala Israelite go long Jericho for spaem datfala taon. Tufala go long haos bilong Rahab. Rahab sei tufala savve stap long haos bilong hem. Long datfala naet, king bilong Jericho herem samfala man kam for spae

and olketa stap long haos bilong Rahab. So king talem olketa man bilong hem for go tekem kam olketa. Rahab tekem tufala spae long flat ruf bilong hem and haedem tufala long there. Hem sei long olketa man bilong king: 'Olketa spae kam long hia, bat olketa go aot finis long gate. Sapos iufala go distaem, bae iufala kasem olketa!' **Long tingting bilong iu, why nao Rahab haedem tufala spae?**— Hem duim datwan bikos hem trustim Jehovah and hem savve Jehovah bae givim Canaan long olketa Israelite.

Bifor tufala spae go from haos bilong Rahab, tufala promisim Rahab, hem and famili bilong hem bae no dae taem Jericho distroe. **Waswe, iu savve wanem nao tufala spae talem Rahab for duim?**— Tufala sei: 'Hangem disfala red rope long window bilong iu. Sapos iu duim datwan, evriwan long haos bilong iu bae no dae.' Rahab barava followim wanem tufala talem. **Wanem nao happen bihaen datwan?**—

Tu-thri day bihaen, olketa Israelite march raonem datfala taon. For sixfala day olketa march raonem wanfala taem nomoa long wanfala day. Bat long mekseven day, olketa march raonem datfala taon sevenfala taem. Then evriwan singaot big. Jehovah mekem wall raon-

READIM OLKETA SCRIPTURE HIA:

Joshua 2:1-24;
6:1-5, 14, 15, 20-25
Hebrew 11:31



Rahab haedem olketa spae bikos hem trustim Jehovah

em datfala taon for foldaon. Bat haos wea red rope hange long window bilong hem no foldaon! **Waswe, iu savve lukim datwan long piksa?**— Jehovah sevem Rahab and famili bilong hem!

Wanem nao iu savve lanem from Rahab?—Rahab trustim Jehovah bikos hem savve long olketa nambawan samting abaotem hem. Hem gud for iu gohed lane abaotem Jehovah. **Waswe, iu trustim Jehovah olsem Rahab?**— Mi savve iu trustim hem!



Jehovah sevem Rahab and famili bilong hem

OLKETA KWESTIN:

- Olketa wanem story nao Rahab herem taem hem smol gele?
- Wanem nao hem duim for helpem tufala Israelite spae? Why nao hem helpem tufala?
- Wanem nao tufala spae promisim Rahab?
- Wanem nao iu savve lanem from Rahab?

4

Hem Mekem Dadi Bilong Hem and Jehovah God Hapi

Iu savve hu nao gele long disfala piksa?— Hem dota bilong wanfala man wea nem bilong hem Jephthah. Bible no talem nem bilong disfala gele, bat iumi savve hem mekem dadi bilong hem and Jehovah God hapi. Wanem nao olketa nara samting iumi savve lanem abaotem hem and dadi bilong hem?

Jephthah hem wanfala gud man and hem teachim gele bilong hem for savve long Jehovah. Pipol respectim hem and hem wanfala strong man. So olketa Israelite laekem hem for leadim olketa for faetem olketa enemy.

Jephthah prea long God for helpem olketa winim wanfala faet. Jephthah promis long Jehovah sapos hem winim datfala faet, hem bae givim long Jehovah firstfala man wea kamaot from haos bilong hem

Jephthah teachim gele bilong hem for savve long Jehovah



Wanem promis nao Jephthah talem long Jehovah?

READIM OLKETA SCRIPTURE HIA:

Deuteronomy 6:4-6

Judges 11:30-40

1 Corinth 7:37, 38

taem hem kam bak. Datfala man mas stap and waka long tabernacle bilong God for full laef bilong hem. Tabernacle hem wanfala big tent wea pipol long datfala taem go for worshipim God. So hu nao winim datfala faet? Jephthah nao win! **Waswe, iu savve hu nao first wan wea kamaot from haos bilong hem taem hem kam bak?**—

Dota bilong Jephthah nao kamaot! Hem nomoa wanfala pikinini bilong Jephthah, and hem mas sendem hem for go stap long tabernacle. Datwan mekem Jephthah barava sorre. Bat tingim, hem promis for duim datwan finis. Stretawe, gele bilong hem sei: 'Dadi, iu promisim Jehovah finis, so iu mas duim wanem iu talem.'

Dota bilong Jephthah tu hem barava sorre. Hem bae no marit and garem pikinini taem hem stap long tabernacle. Bat hem laekem tumas for duim samting followim promis bilong dadi bilong hem and for mekem Jehovah God hapi. Datwan nao hem important long hem winim for marit and garem pikinini. So hem lusim famili bilong hem and go stap long tabernacle for full laef bilong hem.

Waswe, iu tingse wanem hem duim mekem dadi bilong hem and Jehovah God hapi?— Ia! Taem iu obeyim and lovem Jehovah, iu barava followim example bilong dota bilong Jephthah. Datwan bae mekem dadi and mami bilong iu and Jehovah barava hapi.



Hem no isi, bat dota bilong Jephthah duim wanem dadi bilong hem promisim



Evri year olketa fren bilong dota bilong Jephthah go for lukim hem

OLKETA KWESTIN:

- Wanem nao iu lanem abaotem Jephthah? Wanem promis nao hem talem long Jehovah?
- Why nao dota bilong Jephthah hem sorre?
- Wanem nao important long dota bilong Jephthah winim eni nara samting?
- Wanem nao iu savve duim for followim example bilong dota bilong Jephthah?

5

Samuel Evritaem Duim Stret Samting

Start long taem Samuel hem smol pikinini, hem stap long tabernacle and waka long there. Long there nao pipol go for worshipim Jehovah. Waswe, iu save hao nao gogo Samuel stap long tabernacle? Firstaem, iumi bae story abaotem Hannah, mami bilong Samuel.

Hannah laekem tumas for garem pikinini bat hem no save garem pikinini. So hem prea long Jehovah abaotem datwan. Hannah promisim Jehovah, sapos hem garem wanfala son hem bae givim datfala boy long Jehovah for stap long tabernacle and waka long there. Jehovah ansarem prea bilong hem and gogo hem garem wanfala boy wea nem bilong hem Samuel. And olsem Hannah promisim fi-

nis, taem Samuel hem thri or foa year, hem tekem hem go long tabernacle for stap and waka long there.

Eli hem hae priest long tabernacle. Tufala son bilong hem priest long there tu. Tingim, pipol go for worshipim God long tabernacle, and evriwan long there shud duim stret samting. Bat tufala son bilong Eli duim olketa barava nogud samting. Samuel lukim wanem tufala duim. **Waswe, Samuel duim olketa nogud samting olsem tufala son bilong Eli?**— Samuel no followim tufala. Hem evritaem duim stret samting, olsem dadi and mami bilong hem teachim hem.

Wanem nao Eli shud duim long tufala son bilong hem?— Hem shud panisim tufala. Hem shud talem tufala for no gohed waka long tabernacle. From Eli no duim datwan, Jehovah kros long hem and tufala son bilong hem. So Jehovah nao mas panisim olketa.

Wanfala naet, Samuel hem sleep and hem herem samwan kolem hem. Samuel tingse Eli nao kolem hem, bat Eli hem sei: 'Mi no kolem iu.' Tufala taem moa diswan hem happen. So Eli talem Samuel sapos hem herem samwan kolem hem moa, hem shud sei: 'Plis Jehovah, iu sto-



READIM OLKETA
SCRIPTURE HIA:

1 Samuel 2:22-26; 3:1-21

Samuel talem message bilong Jehovah long Eli

ry kam. Talem kam wanem iu laekem.' Samuel duim evri samting wea Eli talem hem. Then Jehovah sei long Samuel: 'Talem Eli mi bae panisim famili bilong hem bikos olketa duim nogud samting.' **Waswe, iu tingse Samuel fraet for talem Eli disfala message?**— Samuel fraet ia, bat hem duim wanem Jehovah talem. Gogo Eli and tufala son bilong hem olketa dae, olsem Jehovah talem.

Samuel showimaot gudfala example for iumi. Hem duim stret samting noma ta hem lukim olketa narawan duim nogud samting. Waswe, bae iu followim example bilong Samuel and evritaem duim stret samting? Sapos iu duim datwan, bae iu mekem Jehovah and dadi and mami bilong iu hapi.



OLKETA KWESTIN:

- Wanem nao mami bilong Samuel promisim long Jehovah?
- Wanem nao tufala son bilong Eli duim long tabernacle?
- Wanem nao Jehovah talem Samuel for duim?
- Wanem gudfala example nao Samuel showimaot for iumi?

David Hem No Fraet

Taem iu fraet, wanem nao iu savve duim?— Maet iu askem mami and dadi bilong iu for helpem iu. Bat narawan hem stap wea savve helpem iu tu. Hem garem bigfala paoa and hem strong winim eni narawan. **Iu savve hu nao hem?**— Hem Jehovah God. Bible storyim wanfala young man wea nem bilong hem David. Hem savve Jehovah bae evritaem helpem hem, so hem no fraet.

Dadi and mami bilong David start for teachim hem for lovem Jehovah taem hem born. Datwan helpem David for no fraet taem hem kasem samfala hard samting. Hem savve Jehovah hem Fren bilong hem and Hem bae helpem hem. David savve lukaftarem olketa sheepsheep. Wanday, wanfala big lion kam tekem wanfala sheepsheep! Iu savve wanem nao David

duim? Hem ronem datfala lion and luk olsem hem iusim hand bilong hem nomoa for killim hem dae! Long narataem wanfala bear attakim olketa sheepsheep, and David killim dae datfala bear tu! **Iu tingse hu nao helpem David?**— Ia, Jehovah nao helpem hem.

Nara taem wea David showimaot hem nating fraet, hem taem wea olketa Israelite faetem olketa Philistine. Wanfala soldia bilong olketa Philistine wea nem bilong hem Goliath, hem big and tol olsem wanfala giant! Hem tok daonem Jehovah and olketa soldia bilong Israel. Goliath askem eniwan long olketa for kam faetem hem. Bat olketa soldia hia fraet tumas for faetem hem. Taem David herem wanem Goliath duim, hem sei long Goliath: ‘Mi nao bae faetem iu! Jehovah bae helpem mi, and mi bae winim iu!’ **Waswe, iu tingse samting wea David duim showimaot hem trustim Jehovah?**— Ia, hem barava trustim Jehovah. Iu laek for savve wanem nao happen bihaen?

David tekem sling bilong hem and faevfala smooth ston, and hem go for faetem datfala giant. Taem Goliath lukim David hem young boy nomoa, hem tok spoelem David. Bat David sei long hem: ‘Iu kam for faetem mi witim sword, bat mi bae faetem iu witim nem bilong Jehovah!’ Then hem putim ston insaed long sling bilong

READIM OLKETA SCRIPTURE HIA:

Psalm 56:3, 4

1 Samuel 17:20-54



David no fraet bikos hem savve Jehovah bae helpem hem

hem and hem ran go long Goliath. Hem swingim sling, and hem sut nao! Ston hia bangam forhed bilong Goliath and datfala giant foldaon and hem dae nao! Taem olketa Philistine lukim datwan, olketa fraet fogud and evriwan ranawe. **Hao nao wanfala young boy olsem David savve winim wanfala giant?**— Jehovah helpem hem,

and Jehovah nao strong winim datfala giant!

Wanem nao iu savve lanem from disfala story abaotem David?— Jehovah hem garem bigfala paoa and hem strong winim eni narawan. And Jehovah hem Fren bilong iu. So sapos enitaem iu fraet, hem gud for trustim Jehovah for helpem iu.

OLKETA KWESTIN:

- Wanem nao David duim taem wanfala lion and wanfala bear attakim olketa sheepsheep bilong hem?
- Taem Goliath tok daonem Jehovah, wanem nao David talem hem?
- Wanem nao David duim for winim Goliath?
- Why nao David no fraet long datfala lion, bear, and giant?
- Wanem nao iu savve lanem from disfala story abaotem David?

Waswe, Iu Savve Feel Sorre and Fraet?

Why nao disfala smol boy luk sorre?

Lukluk long smol boy long piksa. Hem luk sorre and fraet, iaman? **Waswe, enitaem iu savve feel olsem?**— Iumi evriwan save feel olsem samfala taem. Bible story-im samfala fren bilong Jehovah wea sorre and fraet tu. Wanfala long olketa nao hem Elijah. Tingim samting wea happen long hem.

Staka year bifer Jesus kam long earth, Elijah hem stap long Israel. Long datfala taem Ahab hem king bilong Israel. Hem no worshipim trufala God, Jehovah, bat hem and waef bilong hem Jezebel worshipim Baal, wanfala false god. So staka pipol long Israel start for worshipim Baal tu. Queen Jezebel hem barava nogud woman and laek killim dae Elijah and evriwan wea worshipim Jehovah! **Iu savve wanem nao Elijah duim taem hem herem datwan?**—

Jezebel laek for killim dae Elijah

READIM OLKETA
SCRIPTURE HIA:

1 Kings 19:3-18

Psalms 145:18

1 Peter 5:9

Elijah ranawe go haed long wanfala cave wea stap midol long desert. **Why nao hem duim datwan?**— Hem fraet ia. Bat Elijah hem savve finis Jehovah savve helpem hem, so hem shud no fraet. Elijah lukim finis paoa bilong Jehovah. Wan-taem Jehovah sendem fire from heven for ansarem prea bilong Elijah. So hem shud trustim Jehovah for helpem hem!

Taem Elijah stap insaed long datfala cave, Jehovah askem hem: 'Why nao iu kam long hia?' Elijah sei: 'Mi nomoa gohed for worshipim iu. Mi sorre and mi fraet nogud olketa killim mi dae.' Elijah tingse olketa killim dae finis evri narawan wea worshipim Jehovah. Bat Jehovah sei long Elijah: 'Nomoa, hem no tru ia. Seven thousand pipol gohed for worshipim mi. Iu no fraet. Mi garem staka waka yet for iu duim!' **Waswe, iu tingse Elijah hapi for herem staka narawan gohed worshipim Jehovah?**—

Wanem nao iu savve lanem from samting wea happen long Elijah?— Iu garem olketa fren wea lovem Jehovah and lovem iu, so no sorre and fraet. And tu, Jehovah hem garem bigfala paoa, and bae hem evritaem helpem iu! **Waswe, iu hapi for savve long datwan?**—

OLKETA KWESTIN:

- Long taem bilong Elijah, waswe, evriwan long Israel worshipim Jehovah? Hu nao olketa worshipim?
- Why nao Elijah ranawe go haed long wanfala cave?
- Wanem nao Jehovah talem long Elijah?
- Wanem nao iumi savve lanem from samting wea happen long Elijah?




Wanem nao Jehovah duim for helpem Elijah?

Josiah Fren Witim Pipol wea Duim Stret Samting

Waswe, iu tingse hem hard for duim stret samting?— Samfala taem hem no isi. Bible storyim wanfala boy wea nem bilong hem Josiah. Hem barava no isi for hem duim stret samting. Bat hem garem olketa fren wea helpem hem for duim datwan. Distaem bae iumi storyim samting Bible talem abaotem Josiah and olketa fren bilong hem.

Amon nao dadi bilong Josiah, and hem king bilong Judah long datfala taem. Amon hem wanfala nogud man wea worshipim olketa idol. Bihaen hem dae, nomata Josiah hem eit year nomoa, hem kamap king bilong Judah! **Waswe, iu tingse hem nogud king olsem dadi bilong hem?**— Nomoa, hem no olsem!

Nomata Josiah hem smol boy, hem laek for obeyim Jehovah. So hem fren nomoa witim pipol wea lovem Jehovah. And olketa helpem Josiah for duim stret samting. Hu nao samfala fren bilong Josiah?



Zephaniah warnim pipol for no worshipim olketa idol

READIM OLKETA SCRIPTURE HIA:

2 Chronicles 33:21-25;
34:1, 2; 35:25

Wanfala fren bilong hem nao Zephaniah. Zephaniah hem wanfala profet wea warnim pipol bilong Judah sapos olketa worshipim olketa idol, olketa bae kasem nogud samting. Josiah followim warning bilong Zephaniah and no worshipim olketa idol. Hem worshipim Jehovah nomoa.

Nara fren bilong Josiah hem Jeremiah. Hem klosap sem age olsem Josiah and tufala growap tugeta. Tufala best fren, dastawe taem Josiah dae Jeremiah raetem wanfala spesol song wea showimaot hem barava missim Josiah. Jeremiah and Josiah helpem each other for duim stret samting and for obeyim Jehovah.

Wanem nao iu save lanem from gudfala example bilong Josiah?— No-mata taem Josiah hem smol boy, hem laek for duim stret samting. Hem save hem gud samting for fren witim pipol wea lovem Jehovah. Hem gud tu for iu fren witim olketa wea lovem Jehovah bikos olketa save helpem iu for duim stret samting.



Josiah and Jeremiah helpem each other for duim stret samting

OLKETA KWESTIN:

- Hu nao dadi bilong Josiah? Waswe, dadi bilong Josiah duim stret samting?
- Start from taem Josiah hem smol boy, wanem nao hem laek for duim?
- Hu nao nem bilong tufala fren bilong Josiah?
- Wanem nao iu save lanem from gudfala example bilong Josiah?

9


No Eni Samting Stopem Jeremiah for Story Abaotem Jehovah

Samfala taem pipol save tok spoelem iumi or kros long iumi taem iumi story abaotem Jehovah. Diswan save mekem iumi no laek for story abaotem God. **Waswe, enitaem eni samting mekem iu no laek for story abaotem God?**— Bible storyim wanfala young man wea lovem Jehovah, bat samting hem happen wea mekem hem no laek for story abaotem God. Nem bilong disfala young man hem Jeremiah. Tingim samting wea happen long hem.

Taem Jeremiah hem young man nomoa, Jehovah talem hem for warnim olketa Israelite. Hem mas talem olketa for no gohed duim olketa nogud samting. Hem no isi for Jeremiah duim diswan, and hem fraet. Hem sei long Jehovah: ‘Mi

READIM OLKETA
SCRIPTURE HIA:

Jeremiah 1:4-8;
20:7-9; 26:8-19, 24; 38:6-13




Why nao olketa Israelite kros long Jeremiah?

no save story gud. Mi olsem pikinini nomoa.' Bat Jehovah sei long hem: 'Iu no fraet. Bae mi helpem iu.'

So Jeremiah warnim olketa Israelite sapos olketa no change, olketa bae kasem panis. **Waswe, iu ting olketa duim wanem Jeremiah talem?**— Nomoa. Olketa tok spoelem hem and barava kros long hem. Samfala laek for killim hem dae tu! **Waswe, iu tingse Jeremiah hem fraet?**— Hem fraet ia, and hem sei: 'Bae mi no story moa abaotem Jehovah.' **Bat waswe, hem no story nao?**— Nomoa. Hem gohed story abaotem Jehovah bikos hem barava lovem hem. And from Jeremiah no givap, Jehovah protectim hem.

Olsem example, wanfala taem samfala nogud man torowem Jeremiah long wanfala deep hol wea fulap long mud. Hem no garem kaikai or wata. Olketa man hia laekem hem for dae long there. Bat Jehovah iusim olketa narawan for aotem Jeremiah from datfala hol!

Wanem nao iu save lanem from example bilong Jeremiah?— Nomata samfala taem Jeremiah fraet, hem gohed for story abaotem Jehovah. Taem iu story long pipol abaotem Jehovah, maet olketa tok spoelem iu or kros long iu. Maet iu shame or fraet. Bat no letem eni samting stopem iu for story abaotem Jehovah. Hem bae evritaem helpem iu, olsem hem helpem Jeremiah.



Jehovah duim samting for sevem Jeremiah

OLKETA KWESTIN:

- Wanem nao Jehovah talem Jeremiah for duim?
- Wanem nao mekem Jeremiah no laek for story abaotem Jehovah?
- Wanem nao Jehovah duim for helpem Jeremiah?
- Wanem nao iu lanem from example bilong Jeremiah?

Waswe, iu evritaem obeyim mami and dadi?— Samfala taem hem no isi, iaman? **Iu savve hu nao Jesus obeyim?—** Hem obeyim mami and dadi bilong hem, and Jehovah. Example bilong hem savve helpem iu for obeyim mami and dadi, nomata maet hem no isi. Distaem bae iumi storyim gudfala example bilong Jesus.

Bifor Jesus kam long earth, hem stap long heven witim Dadi bilong hem Jehovah. Bat Jesus garem dadi and mami long earth tu. Nem bilong tufala hem Joseph and Mary. **Iu savve hao nao gogo tufala kamap dadi and mami bilong Jesus?—**

Jehovah duim wanfala mirakol for mekem Jesus wea stap long heven for kamap baby wea grow insaed bele bilong Mary, olsem evri nara baby grow insaed bele bilong mami bilong olketa. Bihaen naenfa-

la month, Jesus hem born. Hem nao hao Mary and Joseph kamap mami and dadi bilong Jesus long earth.


Taem Jesus hem 12 year nomoa, hem duim samting wea showimaot hem barava lovem Dadi bilong hem Jehovah. Datwan happen taem Jesus go witim famili bilong hem long Jerusalem for celebratem Pasova. Taem famili gogo bak long ples bilong olketa, Joseph and Mary lukaotem Jesus. **Iu savve wea nao Jesus hem go?—**

Joseph and Mary kwiktaem go bak long Jerusalem and lukaotem Jesus long evri ples. Tufala no savve faendem hem, and datwan mekem tufala wari fogud. Bat bihaen thrifala day, tufala faendem hem long temple! **Waswe, iu savve why nao Jesus go long temple?—** Bikos hem save lane abaotem Dadi bilong hem Jehovah long there. Hem lovem Jehovah and hem laek for savve wanem nao hem mas duim for mekem Jehovah hapi. Jesus hem evritaem obeyim Jehovah start from taem hem smol go kasem taem hem big. Jesus hem obey nomata long taem wea hem no isi, and nomata hem mas safa. **Waswe, Jesus obeyim Joseph and Mary tu?—** Ia, Bible sei hem obeyim tufala.

Wanem nao iu savve lanem from example bilong Jesus?— Iu mas obeyim dadi and mami nomata long taem wea hem no isi. **Waswe, bae iu duim datwan?—**

READIM OLKETA SCRIPTURE HIA:

Luke 1:30-35; 2:45-52
Ephesus 6:1
Hebrew 5:8




Why nao Jesus go long temple?

OLKETA KWESTIN:

- Hao nao gogo Mary and Joseph kamap mami and dadi bilong Jesus long earth?
- Taem mami and dadi bilong Jesus lukaotem hem long Jerusalem, tufala faendem hem long wea?
- Wanem nao iu save lanem from example bilong Jesus?

Olketa Raet Abaotem Jesus Long Bible



Storyim samting wea iu
save long hem abaotem
olketa man hia

Lukluk long olketa man long piksa. Nem bilong olketa nao Matthew, Mark, Luke, John, Peter, James, Jude, and Paul. Olketa laef long taem wea Jesus stap long earth, and olketa raet abaotem Jesus. lumi bae story abaotem olketa distaem.

Thrifala long olketa hem olketa aposol wea preach wit-im Jesus. **Iu save hu nao thrifala hia?**— Hem Matthew, John, and Peter. Aposol **Matthew** and **John** save gud



long Jesus, and each wan raetem wanfala buk abaotem laef bilong Jesus long Bible. Aposol John raetem tu buk bilong Revelation and thrifala leta wea iumi kolem 1 John, 2 John, and 3 John. Aposol **Peter** raetem tufala leta wea stap long Bible. Tufala leta hia hem 1 Peter and 2 Peter. Long mek-tu leta bilong Peter, hem raet abaotem datfala taem wea Jehovah story kam from heven and sei olsem abaotem Jesus: 'Hem nao Son bilong mi. Mi lovem hem, and mi hapi long hem.'


Olketa nara man long piksa raetem samfala buk long Bible tu wea teachim iumi abaotem Jesus. Wanfala long olketa nao hem **Mark**. Taem olketa arrestim Jesus, luk olsem hem stap long there tu and hem lukim evri samting wea happen. Narawan hem **Luke**. Hem wanfala doctor and luk olsem hem kamap wanfala Christian bihaen Jesus hem dae.

Bae iu savve lukim long piksa, nara tufala brata bilong Jesus wea born bihaen long hem. **Iu savve long nem bilong tufala?**— Hem **James** and **Jude**. Long firstaem, tufala no biliv long Jesus and tufala sei hem no garem stret tingting. Bat gogo tufala biliv long Jesus and kamap Christian.

Last wan long olketa hem **Paul**. Bifor hem kamap Christian, nem bilong hem Saul. Hem heitim olketa Christian and

hem barava spoelem olketa. **Iu savve wanem nao happen wea mekem Paul laek for kamap Christian?**— Long wanfala day, taem Paul klosap kasem Damascus, hem herem Jesus story kam long hem from heven. Jesus askem Paul: 'Why nao iu spoelem pipol wea biliv long mi?' Bihaen datwan, Paul hem changem laef bilong hem and kamap Christian. Paul raetem 14-fala buk long Bible, wea hem nao buk bilong Rome go kasem buk bilong Hebrew.

Iumi readim Bible evriday, iaman?— Taem iumi readim Bible, iumi lanem staka samting abaotem Jesus. **Waswe, iu laek for lanem moa samting abaotem Jesus?**—



OLKETA KWESTIN:

- Hu nao nem bilong olketa aposol bilong Jesus wea raet abaotem hem?
- Hu nao nem bilong tufala brata bilong Jesus wea raetem Bible?
- Wanem nao happen wea mekem Paul laek for kamap Christian?

Wanfala Young Man wea No Fraet

Bae iumi lane abaotem wanfala young man wea sevem laef bilong uncle bilong hem. Uncle bilong datfala young man hem aposol Paul. Iumi no savve long nem bilong hem, bat iumi savve hem no fraet taem hem duim wanfala samting. **Waswe, iu laek for herem datfala story?—**

Olketa arrestim Paul bikos hem preach abaotem Jesus and then putim hem long prison long Jerusalem. Samfala rabis man heitim Paul, so olketa mekem wanfala nogud plan. Olketa sei: 'Iumi askem komanda for talem olketa soldia bilong hem for tekem kam Paul long kot. Iumi bae haed long saed road, and taem olketa tekem Paul go pas, iumi bae killim hem dae!'

Boy bilong sista bilong Paul hem herem plan bilong olketa. Wanem nao hem duim? Hem go lukim Paul long prison and storyim datwan long hem. Stretawe, Paul talem hem for go long komanda and storyim datfala nogud plan. **Waswe, iu tingse hem isi nomoa for datfala young man go story long komanda hia?—** Nomoa. Hem no isi, bikos datfala komanda hem wanfala bigman bilong army. Bat hem no fraet and hem story long datfala komanda.

Datfala komanda savve wanem hem bae duim. Hem iusim samting olsem 500 soldia for protectim Paul! Hem talem olketa for tekem Paul long datfala naet go long Caesarea. **Waswe, datwan sevem laef bilong Paul?—** Ia, olketa rabis man no savve attakim hem! Nogud plan bilong olketa nating waka.

Wanem nao iu savve lanem from datfala story?— Iu savve followim example bilong datfala young man for no fraet. Iumi shud no fraet taem iumi story long olketa narawan abaotem Jehovah. **Waswe, bae iu no fraet and gohed story abaotem Jehovah?—** Sapos iu duim olsem, maet iu sevem laef bilong samwan.

READIM OLKETA SCRIPTURE HIA:

Acts 23:12-24

Matthew 24:14; 28:18-20

1 Timothy 4:16

Disfala young man storyim datfala nogud plan long Paul and long komanda



OLKETA KWESTIN:

- Wanem nao samfala rabis man plan for duim long Paul?
- Wanem nao boy bilong sista bilong Paul duim? Hao nao hem showimaot hem no fraet taem hem duim datwan?
- Wanem nao iu save duim for showimaot iu no fraet olsem datfala young man?

Timothy Laek Helpem Pipol

Timothy hem wanfala young man wea hapi for helpem pipol. Hem go long staka ples for helpem olketa narawan. From hem duim olsem, hem barava enjoyim laef bilong hem. **Waswe, iu laek for herem samfala samting moa abaotem datwan?—**

Timothy growap long wanfala big

taon, wea nem bilong hem Lystra. Taem Timothy hem smol, grani bilong hem, Lois, and mami bilong hem, Eunice, start for teachim hem abaotem Jehovah. Start long datfala taem, hem laek helpem olketa narawan for lane abaotem Jehovah.

Nomata Timothy hem young man yet, Paul askem hem for go witim hem for tu-

Mami and grani bilong Timothy teachim hem abaotem Jehovah



fala preach long olketa difren ples. Timothy sei: 'Bae mi kam!' Hem laek for go and helpem olketa narawan.

Timothy go witim Paul long Thessalonica, wanfala taon long Macedonia. For kasem long there, tufala mas baeleg for staka hour and then go long wanfala ship. Long there tufala helpem staka pipol for lane abaotem Jehovah. Bat samfala pipol kros and traе for killim tufala. So Paul and Timothy mas go long olketa nara ples for preach.

Bihaen samfala month, Paul talem Timothy for go bak long Thessalonica for lukim hao nao olketa brata and sista long there. Masbi Timothy fraet for go bak long datfala taon wea olketa laek for killim hem! Bat hem go bikos hem warim olketa. Taem hem go bak long Paul, hem talem gud nius abaotem olketa. Olketa brata and sista long Thessalonica gohed for faithful!

Paul and Timothy waka tugeta for staka year. Wantaem Paul hem sei Timothy nao best wan wea hem savve sendem for helpem olketa long kongregeson. Timothy lovem Jehovah and lovem pipol.

Waswe, iu lovem pipol and laek helpem olketa for lane abaotem Jehovah?—Sapos olsem, iu bae enjoyim laef bilong iu and iu bae barava hapi olsem Timothy!

Timothy barava hapi and enjoyim laef bilong hem



**READIM OLKETA
SCRIPTURE HIA:**

2 Timothy 1:5; 3:15
Acts 16:1-5; 17:1-10
1 Thessalonica 3:2-7
Philippi 2:19-22

OLKETA KWESTIN:

- Timothy hem growap long wea?
- Waswe, Timothy laek for go witim Paul for preach long olketa difren ples? Why nao olsem?
- Why nao Timothy go bak long Thessalonica?
- Wanem nao bae mekem iu barava hapi and enjoyim laef bilong iu, olsem Timothy?

Wanfala Kingdom wea Bae Rulim Full Earth



Iu save wanem Kingdom nao iumi story abaotem?— Hem Kingdom bilong God wea bae mekem earth kamap paradaes. **Waswe, iu laek save moa abaotem disfala Kingdom?—**

Evri kingdom hem garem king. And datfala king rulim pipol wea stap long kingdom bilong hem. **Iu save hu nao King long Kingdom bilong God?—** Hem nao Jesus Christ and hem stap long heven. Klosap nao hem bae rulim evriwan long earth! **Waswe, iu tingse iumi evriwan bae hapi taem Jesus rulim full earth?—**

Iumi bae barava hapi! Long Paradaes, pipol bae no raa or faet long war. Evriwan bae lovem each other. No eniwan bae sik or dae. Olketa wea blind bae save lukluk moa, olketa wea earpas bae save herehere moa, and olketa wea leg bilong olketa nogud bae save ran and jump. Staka kaikai bae stap for evriwan. And olketa animal bae plei witim olketa nara animal, and iumi bae plei witim olketa tu. Olketa wea dae finis bae laef bak. Staka man and woman wea iumi lane abaotem long disfala brochure, olsem Rebekah, Rahab, David, and Elijah,



Wanem nao iu laek for duim long Paradaes?

bae laef bak tu! **Waswe, bae iu laek for meetim olketa long Paradaes?—**

Jehovah lovem iu and hem laekem iu for garem gudfala laef. Sapos iu gohed for lane abaotem Jehovah and duim wanem hem laekem, bae iu savve stap olowe long Paradaes! **Waswe, iu laek for stap long there?—**

**READIM OLKETA
SCRIPTURE HIA:**

Isaiah 2:4; 11:6-9; 25:8;
33:24; 35:5, 6

John 5:28, 29; 17:3

OLKETA KWESTIN:

- Hu nao datfala King long Kingdom bilong God?
- Hu nao olketa wea Jesus bae rulim?
- Wanem gud samting nao pipol bae kasem taem Jesus rulim earth?
- Wanem nao iu mas duim sapos iu laek for stap olowe long Paradaes?



© 2014

Watch Tower Bible and Tract Society of Pennsylvania

Lanem Pikinini Bilong Iu

Olketa wea Pablisim

Watchtower Bible and Tract Society of New York, Inc.
Brooklyn, New York, U.S.A.

Olketa printim long March 2014

Mifala no salem disfala buk. Hem part bilong waka for teachim Bible evriwea long world wea olketa donation sapotim.

Evri toktok from olketa Hebrew Scripture mifala transleitim from English *New World Translation of the Holy Scriptures*. Evri toktok from olketa Christian Greek Scripture hem kam from *Niu World Bible, Matthew–Revelation*. Sapos nomoa, mifala bae talem nem bilong Bible.

Teach Your Children

Solomon Islands Pidgin (yc-SP)

Made in Japan

Olketa wakem long Japan



yc-SP
140314